

01 JAN 1997

Abdullah-Keselamatan

KAWALAN KESELAMATAN DI KEDUTAAN AKAN DITINGKATKAN, KATA ABDULLAH

SUBANG, 1 Jan (Bernama) -- Kerajaan akan meningkatkan kawalan keselamatan di kedutaan Malaysia di luar negara bagi mengelakkan sebarang kejadian yang tidak diingini, kata Menteri Luar Datuk Abdullah Ahmad Badawi.

Menurutnya, kawalan akan ditingkatkan terutama di negara-negara tertentu yang mempunyai risiko ancaman kepada keselamatan pegawai-pegawai kedutaan.

Bagaimanapun, katanya, prosedur penghantaran pegawai Wisma Putra untuk bertugas di luar negara termasuk ke negara Amerika Latin akan diteruskan seperti biasa, katanya kepada pemberita setibanya di Lapangan Terbang Sultan Abdul Aziz Shah, di sini, dari Lima bagi mengiringi kepulangan Duta Malaysia ke Peru, Ahmad Mokhtar Selat.

Beliau berkata langkah itu bagi menjamin keselamatan pegawai kedutaan Malaysia di luar negara berikutan kejadian penahanan Ahmad Mokhtar oleh gerila MRTA di kediaman duta Jepun di Lima baru-baru ini.

Ahmad Mokhtar merupakan antara lebih 250 orang diplomat asing, menteri dan pegawai tinggi kerajaan Peru yang ditahan sebagai tebusan oleh gerila Marxist berhaluan kiri ketika menghadiri majlis jamuan makan malam sempena ulangtahun Maharaja Akihito pada 18 Disember lepas.

Ditanya sama ada pegawai kedutaan Malaysia akan dilengkapi dengan pengawal peribadi, Abdullah berkata: "Tidak perlu sampai ke peringkat itu."

Abdullah berkata, kerajaan akan meningkatkan keselamatan di kedutaan Malaysia di luar negeri dalam situasi normal.

Bagaimanapun dalam situasi yang memerlukan kawalan ketat, "maka sudah semestinya kita mengambil tindakan seumpama itu (menyediakan pengawal peribadi)," katanya.

Katanya, peristiwa di Lima memberi banyak pengajaran kepada kerajaan berhubung keselamatan pegawai-pegawainya di luar negara.

Beliau dan Ahmad Mokhtar akan memberi laporan penuh berhubung kejadian di Lima itu kepada Perdana Menteri Datuk Seri Dr Mahathir Mohamad.

Ahmad Mokhtar, yang berasal dari Kuala Pilah, Negeri Sembilan, pulang bersama keluarganya selepas 12 hari menjadi tebusan gerila Tupac Amaru Revolutionary Movement (MRTA) di kediaman duta Jepun, di Lima. -- BERNAMA

RAZ AD OBA